

16/08/1998

Semua perlu sokong usaha pulih ekonomi

KUALA LUMPUR: Datuk Seri Anwar Ibrahim meminta semua pihak bekerja sebagai satu pasukan dan memberi sokongan penuh kepada usaha kerajaan memulihkan ekonomi negara.

Serentak itu, Timbalan Perdana Menteri berkata, rakyat perlu terus memberi sokongan penuh kepada Perdana Menteri, Datuk Seri Dr Mahathir Mohamad untuk menangani kegawatan ekonomi.

"Sistem politik kita stabil dan ada kesefakatan bekerja dalam satu pasukan, termasuk dalam Majlis Perunding Ekonomi Negara, yang dipengerusikan Perdana Menteri," katanya.

Beliau berkata demikian pada majlis Amanat Negara keempat anjuran Majlis Tertinggi Pelajar Malaysia di United Kingdom (UKEC), di sini semalam.

Menurut Anwar, kestabilan politik perlu dipertahankan untuk memastikan ekonomi negara dapat dipulihkan mengikut agenda sendiri tanpa ditentukan pihak luar.

"Kita juga perlu pertahankan kestabilan politik dan memastikan sistem politik kukuh dan ada kebulatan dalam menangani masalah sekarang," katanya.

Anwar berkata, rakyat juga tidak harus terperangkap dengan desas-desus dan fitnah, walaupun khabar angin seperti itu tidak boleh dielak.

Berikutan itu, katanya, masyarakat khususnya pelajar tidak harus mudah terpengaruh dengan desas-desus dan fitnah dan mereka harus menggunakan kewarasan untuk membuat penilaian dan mengambil keputusan yang bijak.

Timbalan Perdana Menteri berkata, kerajaan yakin masalah ekonomi dapat diatasi dengan ketahanan tinggi rakyat, yang sebelum ini berjaya membangunkan negara dengan kadar pertumbuhan yang pesat.

Antara usaha yang diambil katanya, ialah memastikan projek pembangunan seperti sekolah dan program membantu rakyat miskin diteruskan bagi merangsang pertumbuhan ekonomi.

"Dengan itu usaha merangsang ekonomi tidak ditumpukan di kawasan bandar semata-mata, tetapi lebih menyeluruh merangkumi desa dan kawasan pedalaman."

"Kelulusan projek pembangunan seperti jalan, sekolah perlu cepat dan tidak tertumpu di Kuala Lumpur sahaja," katanya.

(END)